

2. ako ne dostavi nadležnom pravnom licu podatke u vezi sa prijavom i odjavom osiguranog lica, zbog ostvarivanja prava i obaveza iz obaveznog zdravstvenog osiguranja.

Član 92

(1) Novčanom kaznom u iznosu od 1.000 KM do 3.000 KM kazniće se pravno/fizičko lice u slučaju da ne dostavi Fondu zdravstvenog osiguranja sve podatke u prijavi i odjavi u vezi sa prijavom i odjavom osiguranih lica, u svrhu ostvarivanja prava i obaveza iz obaveznog zdravstvenog osiguranja.

(2) Za prekršaj iz stava 1 ovog člana kazniće se novčanom kaznom u iznosu od 300 KM do 1.000 KM i odgovorno lice u pravnom licu.

Član 93

Novčanom kaznom u iznosu od 1.000 KM do 3.000 KM kazniće se izabrani ljekar-doktor medicine u primarnoj zdravstvenoj zaštiti/privatnoj praksi za prekršaj u slučaju da odobri korištenje bolovanja osiguranom licu kada za to nema osnova.

Član 94

Novčanom kaznom u iznosu od 300 KM do 1.000 KM kazniće se osigurano lice za prekršaj ukoliko:

- namjerno prekorači privremenu spriječenost za rad,
- sprečava ozdravljenje, odnosno osposobljenje za rad,
- obavlja drugu djelatnost za vrijeme spriječenosti za rad,
- ne odgovori na poziv za ljekarski pregled izabranog ljekara-doktora medicine primarne zdravstvene zaštite,
- bez opravdanog razloga ne pridržava se uputa za liječenje,
- bez dozvole svog doktora napusti mjesto gdje živi ili ne obavijesti izabranog doktora primarne zdravstvene zaštite o svom stanju u roku od tri dana od dana kada je obolilo,
- ako ostvari pravo na naknadu putnih troškova vezanih za medicinski tretman, kada za to nema pravnog osnova (član 41) i
- ako koristi ispravu kojom dokazuje status osiguranog lica na način suprotan odredbama ovog zakona i propisa donesenih na osnovu ovog zakona.

VII PRIJELAZNE I ZAVRŠNE ODREDBE

Član 95

(1) Obavezno zdravstveno osiguranje uspostavljeno u skladu sa ovim zakonom počinje funkcionisati od 1. marta 2002. godine do kada je Odjel za zdravstvo dužan osigurati sve potrebne preduslove za funkcionisanje Fonda zdravstvenog osiguranja.

(2) Prošireno zdravstveno osiguranje u skladu sa ovim zakonom počinje funkcionisati u roku od 24 mjeseca od uređenja sistema obaveznog zdravstvenog osiguranja.

(3) Dobrovoljno zdravstveno osiguranje, u skladu sa ovim zakonom, počinje funkcionisati 1. marta 2002. godine.

(4) O pravima i obavezama proizašlim iz ovog zakona Odjeljenje za zdravstvo i Fond zdravstvenog osiguranja su dužni je dužan na adekvatan način informisati sve subjekte uključene u finansiranje zdravstvenog osiguranja, uključujući i osiguranike.

Član 96

Do uspostavljanja Fonda za zdravstveno osiguranje, sve poslove iz njegove nadležnosti određene ovim zakonom obavljaće Odjel za zdravstvo.

Član 97

U roku od 6 mjeseci od početka funkcionisanja obaveznog zdravstvenog osiguranja, organi i institucije određene ovim zakonom su dužni:

- zaključiti ugovore sa davaocima zdravstvenih usluga i usluga prevoza,
- donijeti Pravilnik iz člana 25 ovog zakona i druge prateće akte,
- stvoriti preduslove za uspostavu sistema osiguranja-reosiguranja naknade plate iz člana 39 ovog zakona,
- odrediti najniži i najviši iznos na koji se, prema članu 76 ovog zakona, obračunava doprinos,

- izvršiti kalkulaciju potrebnih iznosa za individualno učešće po osiguraniku i odrediti visinu ličnog učešća osiguranika u snošenju troškova zdravstvenih usluga koje treba da budu dodatno pokriveno individualnim učešćem (iznos će biti fiksna godišnja suma, uplaćena direktno Fondu zdravstvenog osiguranja),
- prekinuti protok novca između davaoca zdravstvenih usluga i osiguranih lica, sem u propisanim slučajevima,
- stvoriti preduslove za akreditaciju novih davalaca usluga.

Član 98

Do implementacije sistema porodične medicine primjenjivaće se postojeća procedura koja se odnosi na sistem upućivanja, određena od strane Odjela za zdravstvo.

Član 99

Osnovni paket usluga iz obaveznog i dobrovoljnog zdravstvenog osiguranja utvrđuje se u roku od 24 mjeseca od stupanja na snagu ovog zakona.

Član 100

Doprinosi na poljoprivredni prihod, kao i oni koji se odnose na iznajmljivanje zemljišta, plaćaće se kao fiksni mjesečni iznos sve dok nadležni organ Distrikta ne obavi razrez poreza na poljoprivredno zemljište.

Član 101

(1) Stupanjem na snagu ovog zakona prestaju se primjenjivati na području Distrikta zakoni Entiteta iz oblasti zdravstvene zaštite koji su se do tada primjenjivali, kao i na njima zasnovani podzakonski akti.

(2) Do donošenja pratećih propisa određenih ovim zakonom, primjenjivaće se postojeći propisi u dijelu u kome nisu u suprotnosti sa odredbama ovog zakona.

Član 102

Zakon o zdravstvenom osiguranju u Brčko distriktu BiH stupio je na snagu 7. februara 2002. godine, a njegove izmjene i dopune 1. jula 2002. godine, 17. jula 2007. godine, 20. februara 2008. godine i 27. augusta 2008. godine.

344

Na osnovu člana 8 Zakona o Službenom glasniku Brčko distrikta BiH («Službeni glasnik Brčko distrikta BiH», brojevi: 1/00 i 17/04) i Odluke o davanju ovlaštenja Zakonodavnoj komisiji Skupštine Brčko distrikta BiH broj: 01-02-218/17 od 13. 9. 2017. godine, Zakonodavna komisija Skupštine Brčko distrikta BiH na 43. sjednici održanoj 20. 6. 2018. godine utvrdila je prečišćeni tekst Zakona o električnoj energiji («Službeni glasnik Brčko distrikta BiH», broj 36/04) s izmjenama i dopunama Zakona o električnoj energiji («Službeni glasnik Brčko distrikta BiH», brojevi: 28/07, 61/10 i 4/13).

Broj: 01.3.-05-683/18
Brčko, 20. 6. 2018. godine.

PREDSJEDAVAJUĆI ZAKONODAVNE KOMISIJE
Ljubiša Lukić, s. r.

ZAKON O ELEKTRIČNOJ ENERGIJI (PREČIŠĆENI TEKST)

I. OSNOVNE ODREDBE

Član 1

Zakon o električnoj energiji uspostavlja pravila za proizvodnju, snabdijevanje i distribuciju električne energije na prostoru Brčko distrikta BiH i trgovine u ime Brčko distrikta BiH. Zakon reguliše uspostavljanje i rad elektroenergetskog sistema isključivo u prethodno navedenim oblastima.

Cilj ovog zakona je da utvrdi uslove potrebne za racionalan i ekonomičan razvoj djelatnosti proizvodnje i distribucije električne energije na prostoru Brčko distrikta BiH, da

stvori uslove za život i rad i da promoviše preduzeća za pružanje javnih usluga za nesmetano snabdijevanje potrošača električnom energijom.

Zakon se zasniva na općeprihvaćenim međunarodnim standardima na polju električne energije i teži da promoviše postepenu liberalizaciju tržišta električne energije. Pri tome, Zakon slijedi principe nediskriminacije i ravnopravnosti lica i svojine.

Član 2

Ovaj zakon je u skladu sa Zakonom o prenosu, regulatoru i operateru sistema električne energije u Bosni i Hercegovini, koji propisuje osnivanje i rad Državne regulatorne komisije za električnu energiju (u daljnjem tekstu: DERK), Nezavisnog operatera sistema (u daljnjem tekstu: NOS), Kompanije za prenos električne energije i funkcije i ovlaštenja svakog pojedinog od ovih tijela.

Zakonom iz stava 1 ovog člana propisana je nadležnost DERK-a za pitanje proizvodnje, distribucije i snabdijevanja kupaca električne energije u Brčko distriktu Bosne i Hercegovine. U slučaju sukoba odredbi ovog zakona i zakona iz stava 1 ovog člana u vezi s prenosom, pogonom prenosnog sistema i međunarodnom trgovinom, primjenjivat će se odredbe zakona iz stava 1 ovog člana.

Član 3

Značenje termina koji se koriste u ovom zakonu:

- "proizvodnja" označava proizvodnju električne energije u hidroelektranama, termoelektranama i drugim elektranama koje su priključene na prijenosnu ili distributivnu mrežu, kao i proizvodnju za vlastite potrebe,
- "proizvođač za vlastite potrebe" označava fizičko ili pravno lice koje električnu energiju, u suštini, proizvodi za vlastite potrebe,
- "nezavisni proizvođač" je proizvođač koji ne vrši funkcije prijenosa ili distribucije električne energije na teritoriji Brčko distrikta BiH,
- "obnovljivi izvori električne energije" označavaju izvore električne energije koji su sačuvani u prirodi i koji se obnavljaju u cijelosti ili djelimično, posebno energija vodotoka, vjetra, biomasa, geotermalna i neakumulirana solarna energija,
- "prijenos" označava prenošenje električne energije u visokonaponskom povezanom sistemu s ciljem njene isporuke krajnjim kupcima ili distribuciji,
- "distribucija" označava prenošenje električne energije kroz distributivne sisteme srednjeg i niskog napona s ciljem njene isporuke kupcima,
- "kupci" označavaju kupce na veliko, krajnje kvalifikovane i nekvalifikovane kupce i distributivna preduzeća,
- "kupci na veliko" označavaju pravna lica koja kupuju i prodaju električnu energiju kupcima, osim krajnjim kupcima kojima nije dozvoljeno da slobodno biraju isporučioća električne energije i koja se na teritoriji Brčko distrikta BiH ne bave proizvodnjom, prijenosom ili distribucijom električne energije,
- "krajnji kupac" označava kupca koji kupuje električnu energiju za svoje vlastite potrebe i korišćenje,
- "kvalifikovani kupac" označava svakog kupca koji je priključen na prijenosnu ili distributivnu mrežu, koji ima godišnju potrošnju električne energije veću od 10 GWh i kome je dozvoljeno da električnu energiju kupuje po svom izboru,
- "nekvalifikovani kupac" označava kupca za koga se električna energija dobavlja na regulisan način i po regulisanim cijenama (tarifama),
- "interkonektori" označavaju opremu koja se koristi za povezivanje elektroenergetskih sistema,
- "povezani sistemi" označavaju izvjestan broj prijenosnih i distributivnih sistema koji su povezani pomoću jednog ili više interkonektora,
- "korisnik sistema" podrazumijeva svako fizičko ili pravno lice koje snabdijeva, ili koga snabdijeva, neki prijenosni ili distributivni sistem,
- "snabdijevanje" podrazumijeva isporuku i/ili prodaju električne energije kupcima,

- "elektroenergetski objekti krajnjih kupaca" podrazumijavaju elektroenergetske objekte koji se nalaze iza mjesta priključenja na elektroenergetsku mrežu,
- "isporučilac električne energije" podrazumijeva korisnika dozvole koji snabdijeva krajnje kupce električnom energijom,
- "postupak licitacije" označava postupak kojim vrši izbor najpovoljnijeg isporučioća električne energije za Brčko distrikt BiH ili se planirane dodatne potrebe i zamjena kapaciteta pokrivaju isporukama iz novih ili postojećih proizvodnih kapaciteta,
- "trgovac" označava pravno lice koje se bavi trgovinom električne energije,
- "DERK" označava Državnu regulatornu komisiju za električnu energiju definisanu Zakonom o prenosu, regulatoru i operateru sistema električne energije u Bosni i Hercegovini,
- "NOS" označava Nezavisnog operatera sistema definisanog Zakonom o prijenosu, državnom elektroenergetskom regulatoru i Nezavisnom operateru sistema,
- "električna energija" označava robu čija se proizvodnja, distribucija, snabdijevanje, promet i korištenje propisuje ovim zakonom i podzakonskim aktima donesenim na osnovu ovog zakona;
- "Opći uslovi za isporuku i snabdijevanje električnom energijom Brčko distrikta BiH" označavaju pravila o uslovima za isporuku električne energije koja utvrđuje DERK;
- "Tarifni sistem za prodaju električne energije" je sistem kriterija i pravila koji sadrži:
 - tarifne elemente, način njihove primjene u određenim dnevnim intervalima i sezonama za
 - kategorije potrošnje i grupe kupaca i tarifne stavove za obračun cijene prenesene,
 - distribuirane, odnosno utrošene električne energije koju utvrđuje "DERK".

Član 4

Elektroenergetski objekti, uređaji, vodovi i postrojenja elektroenergetskih preduzeća i krajnjih kupaca, u djelatnostima koje reguliše ovaj zakon, grade se, koriste i održavaju u skladu s propisima Bosne i Hercegovine, entiteta i Brčko distrikta BiH, standardima i tehničkim normativima koji se odnose na tu vrstu objekata, kao i propisima kojima su utvrđeni uslovi u pogledu zaštite životne sredine i ne smiju ugrožavati sigurnost ljudi i imovine.

II. ELEKTROENERGETSKA POLITIKA

Član 5

Vlada Brčko distrikta BiH vodi elektroenergetsku politiku u skladu sa ovim zakonom.

Elektroenergetskom politikom se obezbjeđuje:

- struktura i kvalitet napajanja električnom energijom,
- dugoročna uravnoteženost razvoja elektroenergetske i energetske privrede u cjelini s kretanjem potrošnje energije,
- mogućnost korišćenja različitih izvora energije,
- upotreba obnovljivih izvora za proizvodnju električne energije,
- briga za efikasno korišćenje energije,
- očuvanje ekološke ravnoteže pri proizvodnji, prijenosu i korišćenju električne energije,
- konkurentnost na tržištu električne energije i tržištu drugih vidova energije,
- kvalitetno snabdijevanje električnom energijom svih kupaca,
- racionalna potrošnja električne energije.

Član 6

Elektroenergetskom politikom obezbjeđuje se pristup na distributivnu mrežu po principu nediskriminacionog pristupa treće strane.

Član 7

Nadležan organ preduzeća za snabdijevanje električnom energijom donosi dugoročne i godišnje elektroenergetske bilanse.

Elektroenergetskim bilansima okvirno se planira ukupna potrošnja električne energije i način snabdijevanja električnom energijom u srednjoročnom i dugoročnom periodu, u saradnji sa NOS-om.

Elektroenergetski bilans sadrži:

- strukturu potrošnje električne energije,
- način snabdijevanja električnom energijom,
- zahtjeve u pogledu ekološke zaštite i mjere kojima se ona obezbjeđuje,
- strukturu i karakteristike potrošnje novih i proširenje postojećih potrošača,
- viškove električne energije,
- planove i prognoze, na osnovu preporuka proizvođača i distributera, u kooperaciji sa NOS-om.

Dugoročni elektroenergetski bilans se odnosi na razdoblje od pet godina unaprijed.

III. OBAVLJANJE ELEKTROENERGETSKE DJELATNOSTI

Član 8

Elektroenergetskim djelatnostima koje su predmet ovog zakona smatraju se:

- proizvodnja električne energije,
- distribucija električne energije,
- trgovina i snabdijevanje električnom energijom.

Član 9

Elektroenergetske djelatnosti iz člana 8 obavljaju:

- preduzeća za proizvodnju električne energije,
- preduzeća za distribuciju električne energije,
- preduzeća za trgovinu električnom energijom.

Preduzeća iz stava 1 ovog člana, kao i preduzeća koja obavljaju više elektroenergetskih djelatnosti iz člana 8 ovog zakona, osnivaju se u skladu sa Zakonom o javnim preduzećima u Brčko distriktu BiH ("Službeni glasnik Brčko distrikta BiH" broj 15/06).

Proizvodnjom električne energije, na način i pod uslovima utvrđenim ovim zakonom, mogu se baviti preduzeća iz stava 1 ovog člana, uz mogućnost plasmana viškova električne energije na tržište.

Član 10

Osnivanje, upravljanje, organizovanje i međusobno povezivanje preduzeća iz člana 9 ovog zakona se obavlja u skladu sa Zakonom o javnim preduzećima u Brčko distriktu BiH.

Zakon o izmjenama i dopunama Zakona o električnoj energiji („Službeni glasnik Brčko distrikta BiH" broj 4/13), u članu 10 stav 2 se briše.

IV. REGULISANJE OBAVLJANJA ELEKTROENERGETSKE DJELATNOSTI

Član 11

Regulisanje monopolskog ponašanja i osiguranja transparentnog i nediskriminirajućeg položaja svih učesnika na elektroenergetskom tržištu Brčko distrikta Bosne i Hercegovine obavlja DERK.

Zakon o izmjenama i dopunama Zakona o električnoj energiji („Službeni glasnik Brčko distrikta BiH" broj 4/13), članovi: 12, 13, 14, 15, 16, 17, 18, 19, 20, 21, 22, 23, 24, 25, 26, 27, 28, 29, 30 i glava V. S članovima 31 i 32 Zakona, brišu se.

VI. PROIZVODNJA ELEKTRIČNE ENERGIJE

Član 33

Preduzeće koje obavlja djelatnost proizvodnje električne energije ima pravo:

- u svojim proizvodnim objektima koristiti izvore energije koje smatra najpovoljnijim,
- proizvoditi potrebnu energiju poštujući tehničke karakteristike i uslove zaštite okoline koji su utvrđeni u dozvoli i određeni propisima,
- ugovarati isporuke i prodaju električne energije pod uslovima utvrđenim ovim zakonom i drugim propisima,
- pristupa prenosnoj i distributivnim mrežama pod uslovima koje utvrđuje DERK.

Član 34

Preduzeće koje obavlja djelatnost proizvodnje električne energije ima obavezu da:

- poštuje uslove iz dozvole za obavljanje elektroenergetske djelatnosti,

- posjeduje mjerni uređaj koji omogućava mjerenje energije koja se predaje u odgovarajuću mrežu,
- pridržava se pravila djelovanja na tržištu koja su propisana za tržište električne energije,
- zadovoljava i poštuje propisane tehničke i pogonske uslove zaštite okoline.

Objekti za proizvodnju električne energije moraju zadovoljavati utvrđene kriterije zaštite okoline i osigurati trajnu kontrolu uticaja na okolinu.

Član 35

Preduzeće koje u pojedinačnom proizvodnom objektu proizvodi električnu energiju, koristeći otpad ili obnovljive izvore energije, na ekonomski primjeren način i u skladu s mjerama zaštite okoline, može steći položaj kvalifikovanog proizvođača, po osnovu uslova koje propisuje DERK.

Podsticanje na proizvodnju električne energije iz obnovljivih izvora, uključujući i otpad, kao i kombinovanu proizvodnju toplotne i električne energije propisuje DERK a sve u svrhu postizanja ciljeva proizvodnje električne energije iz obnovljivih izvora i energetske efikasnosti, definisanih elektroenergetskom politikom iz člana 5 ovog zakona.

VII. DISTRIBUCIJA ELEKTRIČNE ENERGIJE I PRISTUP DISTRIBUTIVNOJ MREŽI

Član 36

Distributivni sistem čine elektroenergetski objekti (postrojenja i vodovi) kojima se razvodi električna energija kupcima.

Član 37

U cilju nesmetanog funkcionisanja tržišta električne energije na teritoriji Brčko distrikta BiH, distributivna mreža mora biti dostupna svim korisnicima na transparentan i nediskriminirajući način, u skladu s kriterijima iz ovog zakona.

Član 38

Za rad (pogon), upravljanje, održavanje i razvoj distributivnog sistema odgovoran je operator distributivnog sistema (distributer).

Distributer je dužan da omogući prijenos električne energije kroz svoju mrežu, kao i distribuciju električne energije na svom području na osnovu zahtjeva korisnika mreže, što podrazumijeva i da operiše s distributivnom mrežom u skladu s tehničkim mogućnostima mreže.

Distributer ima pravo i obavezu da vrši snabdijevanje korisnika sistema i kupaca električnom energijom na svom području djelovanja, ako je tako utvrđeno u dozvoli za obavljanje djelatnosti.

Član 39

Distributer električne energije:

- garantuje pouzdanost rada distributivne mreže i održavanje parametara kvaliteta električne energije,
- osigurava usklađeno djelovanje distributivne sa prijenosnom mrežom, te priključenim mrežama i postrojenjima korisnika,
- daje informacije Nezavisnom operateru sistema o budućim potrebama za električnom energijom,
- osigurava pristup distributivnoj mreži za treće strane prema utvrđenim kriterijima.

Član 40

Distributer priprema kratkoročne i dugoročne planove razvoja i izgradnje distributivne mreže.

Planovi iz stava 1 ovog člana rade se u skladu sa strategijom energetske razvoja Brčko distrikta BiH i prostorno-planskim dokumentima iz oblasti uređenja prostora.

Planove iz stave 1 ovog člana odobrava DERK u skladu sa svojim nadležnostima.

Član 41

Distributer je obavezan da osigura tajnost povjerljivih podataka koje dobija od drugih elektroenergetskih preduzeća i kupaca, osim ako se posebnim propisom ne zahtijeva javno objavljivanje određenih podataka ili njihova dostava nadležnim državnim tijelima.

Podaci o mogućnostima korišćenja distributivne mreže su javni.

Član 42

Distributer je dužan da omogući pristup mreži proizvođača električne energije i kvalifikovanim kupcima električne energije na nepristrasan način, prema načelima regulisanog pristupa treće strane.

Član 43

Distributer može odbiti pristup mreži zbog ograničenih tehničkih ili pogonskih mogućnosti.

Proizvođač električne energije i/ili kvalifikovani kupac električne energije, kojem je odbijen pristup mreži, mora biti informisan o razlozima odbijanja pristupa, koji moraju biti objektivni, nediskriminirajući, te čvrsto utemeljeni i propisno potkrijepljeni.

Proizvođač električne energije, odnosno kvalifikovani kupac električne energije kojem je odbijen pristup, može podnijeti žalbu DERK-u.

Član 44

Kada proizvođač električne energije i kupac namjeravaju zaključiti ugovor o isporuci, a nisu mogli dobiti pristup mreži, mogu izgraditi direktan vod, uz prethodno pribavljenu saglasnost DERK-a.

Član 45

Pogon i način vođenja distributivne mreže u elektroenergetskom sistemu uređuje se mrežnim pravilima.

Mrežnim pravilima posebno se propisuju:

- tehnički i drugi uslovi za priključenje korisnika na mrežu,
- tehnički i drugi uslovi za siguran pogon elektroenergetskog sistema radi pouzdanog snabdijevanja kvalitetnom električnom energijom,
- postupci pri pogonu elektroenergetskog sistema u kriznim stanjima,
- tehnički i drugi uslovi za međusobno povezivanje i djelovanje mreža.

Mrežna pravila izrađuje distributer, a odobrava DERK.

Ova pravila ne mogu biti u suprotnosti s pravilima izrađenim od NOS-a za prijenosnu mrežu.

Član 46

Prijenos električne energije putem distributivne mreže vlasnik mreže može ograničiti samo u posebnim slučajevima, kao što su:

- kada je to iz razloga sigurnosti elektroenergetskog sistema, pogonskih razloga ili iz razloga sigurnosti ljudi opravdano, što treba posebno dokazati,
- kada to zahtijavaju propisi o zaštiti okoline,
- kada ugrožava pogon kombinovanog prijenosa proizvodnje toplotne i električne energije ili pogon izvora regeneracijske energije iz otpadnih materijala,
- kada to ugrožava sistem proizvodnje električne energije.

VIII. KUPCI

Član 47

Svi kupci u Brčko distriktu BiH su kvalifikovani kupci i imaju mogućnost slobodnog izbora snabdjevača električnom energijom.

Izuzetno od stava 1 ovog člana, kupci iz kategorije potrošnje domaćinstava pravo na slobodan izbor snabdjevača električnom energijom mogu koristiti od 1. januara 2015. godine.

Član 48

Kvalifikovani kupac može slobodno izabrati snabdjevača električne energije.

Kvalifikovani kupac i snabdjevač električne energije koga on slobodno izabere ugovaraju količinu i cijenu električne energije koja je predmet ugovora.

Član 49

Nekvalifikovani (tarifni) kupci snabdjevaju se električnom energijom u sistemu obaveze javne usluge snabdijevanja po cijenama iz tarifnog sistema za prodaju električne energije.

IX. SISTEM IZDAVANJ

Član 50

U elektroenergetskom sektoru izdaju se:

- dozvola (licenca) za obavljanje djelatnosti proizvodnje, distribucije, snabdijevanja i trgovine električnom energijom;
- elektroenergetska saglasnost;
- dozvola za izgradnju elektroenergetskih objekata.

Član 51

Dozvole za obavljanje djelatnosti proizvodnje, distribucije, snabdijevanja i trgovine izdaju se pravnim i fizičkim licima koja:

- imaju upis u sudski registar za obavljanje elektroenergetske djelatnosti,
- ispunjavaju uslove tehničke opremljenosti za obavljanje djelatnosti,
- ispunjavaju ekonomsko-finansijske uslove za obavljanje djelatnosti,
- ispunjavaju uslove zaštite na radu, zaštite od požara i uslove zaštite okoline.

Član 52

Dozvole za obavljanje djelatnosti za preduzeća u oblasti proizvodnje, distribucije, snabdijevanje i trgovine električnom energijom na području Brčko distrikta BiH izdaje DERK.

Član 53

DERK izdaje dozvolu za obavljanje djelatnosti na osnovu podnesenog zahtjeva.

Postupak izdavanja dozvole je javan i vodi se u skladu sa objektivnim i javnosti poznatim kriterijima na nediskriminirajući i transparentan način.

DERK je dužan da se konsultuje o uslovima svake dozvole, prije njenog izdavanja, i da pozove zainteresovane strane da daju komentare na nacrt dozvole kroz process javne rasprave – konsultacije.

Član 54

Ako korisnik dozvole proda svoj posao ili ako traži da prenese svoju dozvolu ili kontrolišući (upravljački) interes, novi vlasnik mora dobiti dozvolu ili odobrenje za takav transfer od DERK-a.

Član 55

U rješavanju zahtjeva za davanje, produženje, izmjenu, dopunu ili prijenos dozvole, DERK se pridržava pravila koja samostalno donosi.

Pravila iz stava 1 ovog člana obavezno sadrže postupak podnošenja zahtjeva i kriterije izdavanja dozvole, koja moraju uključivati:

- bezbjednost elektroenergetskog sistema, instalacija i pripadajuće opreme,
- zaštitu okoline,
- korišćenje zemljišta i određivanje lokacije,
- korišćenje javnog zemljišta,
- energetske efikasnost,
- prirodu primarnih izvora,
- elemente za ocjenu tehničke, ekonomske i finansijske mogućnosti i drugih bitnih karakteristika podnosioca zahtjeva.

Kriteriji i postupci za izdavanje dozvole su javni.

Član 56

Svi pravni subjekti u oblasti proizvodnje, distribucije, snabdijevanja i trgovine električnom energijom u Brčko distriktu BiH, obavezno podnose zahtjeve za izdavanje odgovarajuće dozvole (licence) DERK-u.

Član 57

Zahtjev za davanje, produženje, izmjene, dopunu ili prijenos dozvole podnosi se DERK-u u formi i na način propisan pravilima koje je usvojio DERK.

Član 58

Ako DERK odbije zahtjev za izdavanje dozvole obavezan je o istom dati obrazloženje podnosiocu zahtjeva, u skladu s pravilima i propisima koje sam donosi.

Član 59

Dozvola za proizvodnju električne energije daje se za tačno određeni period, ali ne duži od 30 godina, računajući od datuma početka proizvodnje.

Član 60

Dozvola za distribuciju električne energije daje se za tačno određeni period, ne duži od 30 godina, za tačno određeno područje.

Član 61

Krajnji kupac koji je povezan na distributivnu mrežu mora isplatiti korisniku dozvole trošak instalisanja i održavanja priključka, u skladu sa uslovima iz dozvole.

Priključak iz prethodnog stava postaje integralni dio distributivne mreže korisnika dozvole.

Član 62

Za priključenje novih ili povećanje priključne snage postojećih trošila krajnji kupci povezani na distributivnu mrežu plaćaju poseban jednokratni novčani iznos radi obezbjeđenja uslova za priključenje, odnosno povećanje priključne snage postojećih trošila.

Kriterije, visinu i namjenu sredstava iz stava 1 ovog člana predlaže DERK, a utvrđuje se općim uslovima za isporuku i snabdijevanje električnom energijom Brčko distrikta BiH.

Član 63

Dozvola za obavljanje djelatnosti trgovine i snabdijevanja električnom energijom izdaje se na period do pet godina, s tim da DERK može odobriti produženje roka važenja dozvole.

Dozvola za obavljanje djelatnosti trgovine i snabdijevanja električnom energijom kvalifikovanih kupaca može se izdati preduzećima koja obavljaju djelatnost proizvodnje električne energije i drugim pravnim licima, pod uslovom da su ova preduzeća samostalna u odnosu na preduzeća za distribuciju električne energije.

Za snabdijevanje nekvalifikovanih kupaca na određenom distributivnom području izdaje se posebna dozvola.

Uslovi za dobijanje dozvole iz stava 3 ovog člana obuhvataju obavezu snabdijevanja kupaca kojima nije dozvoljeno da slobodno biraju svog snabdjevača, te način određivanja i nadziranja primjene cijena za ove kupce i standarde kvaliteta snabdijevanja.

Izdavanjem dozvole za trgovinu i snabdijevanje električnom energijom može se utvrditi pravo korisniku dozvole da trguje s kupcima koji imaju pravo izbora snabdjevača (kvalifikovanim kupcima), kao i s drugim korisnicima dozvole za obavljanje elektroenergetskih djelatnosti.

Uz zahtjev za izdavanje dozvole za trgovinu i snabdijevanje električnom energijom, podnosilac prilaže odgovarajuće dokaze o ispunjavanju tehničkih, administrativnih i finansijskih uslova, u skladu s pravilima koja donosi DERK.

Trgovina i snabdijevanje električnom energijom, izuzev snabdijevanja nekvalifikovanih kupaca, vrši se slobodno u skladu s uslovima iz ovog zakona i izdatom dozvolom.

Član 64

Ako korisnik dozvole čini prekršaj po ovom zakonu ili ne ispunjava svoje obaveze iz dozvole, DERK će ga pismenim putem upozoriti o nedozvoljenoj radnji, određujući mu rok u kome će to otkloniti.

Sankcije ili postupak protiv korisnika dozvole ne odlažu otklanjanje posljedica iz prethodnog stava.

Ako poslije perioda iz stava 1 ovog člana prekršaj ili neispunjenje obaveze iz dozvole još postoji, DERK može poništiti dozvolu, bez obzira na postupak protiv korisnika dozvole.

Član 65

Korisnik dozvole mora za vrijeme trajanja dozvole, a na zahtjev krajnjeg kupca, u okviru svoje djelatnosti, otklanjati smetnje u redovnom snabdijevanju električnom energijom.

Član 66

Unutar područja za koja je data distributivna dozvola, korisnik dozvole je obavezan da poveže i distribuira električnu

energiju svim krajnjim kupcima koji su dobili saglasnost za priključenje u tom području.

Zabranjeno je krajnjim kupcima da samovlasno priključuju na električnu mrežu svoje energetske objekte, uređaje i instalacije.

Član 67

Ako elektroenergetski objekti, uređaji i instalacije krajnjeg kupca ne ispunjavaju propisane tehničke uslove, može se privremeno odbiti priključenje na elektroenergetsku mrežu i odrediti rok u kome je krajnji kupac dužan da otkloni nedostatak.

Član 68

Dozvolu za izgradnju elektroenergetskih objekata izdaje DERK.

Certifikat za ispunjenje uslova iz dozvole za izgradnju svakog elektroenergetskog objekta daje Regulator u skladu sa ovim zakonom.

Član 69

Nakon isteka dozvole za izgradnju, ukoliko dozvola nije produžena ili prenesena ili objekat bude korišćen za druge namjene, korisnik dozvole mora demontirati i ukloniti sve objekte i urediti zemljište u skladu sa zahtjevom DERK-a u roku od 2 godine.

Korisnik dozvole mora obezbijediti garanciju na iznos potreban za izvršenje radova iz prethodnog stava.

DERK može u interesu Brčko distrikta BiH, osloboditi korisnika dozvole demontaže i uklanjanja objekta iz stava 1 ovog člana.

Odredbe ovog člana ne odnose se na korisnika dozvole za trgovinu.

Član 70

U posebnim slučajevima, zbog općeg interesa, DERK može promijeniti uslove navedene u dozvoli za izgradnju.

Prije donošenja odluke o promjeni uslova dozvole za izgradnju, mora se uzeti u obzir trošak koji se može pojaviti za korisnika dozvole zbog promjene uslova, kao i opće koristi i štete koje su rezultat te promjene.

Primjena uslova navedenih u dozvoli za izgradnju DERK može odobriti na osnovu zahtjeva korisnika dozvole ili na svoju inicijativu.

Zahtjev za promjenu uslova u dozvoli za izgradnju korisnik dozvole podnosi na osnovu pravila koja usvaja DERK.

X. ELEKTROENERGETSKE SAGLASNOSTI**Član 71**

Elektroenergetska saglasnost može biti prethodna i stalna.

Član 72

Prethodna elektroenergetska saglasnost je potvrda da planirani elektroenergetski objekat u skladu sa razvojnim planovima, tehničkim standardima i uslovima koji se u prostornom planu Distrikta odnose na elektroenergetske objekte. Prethodna elektroenergetska saglasnost potrebna je za dobijanje lokacijskih uslova i odobrenja za građenje.

Član 73

Stalna elektroenergetska saglasnost izdaje se za sve izgrađene elektroenergetske objekte. Ona sadrži sve tehničke uslove vezane za rad objekta, način i uslove upravljanja objektom i uslove vezane za upotrebu javnog dobra i javne infrastrukturne i druge uslove koje propiše DERK.

Član 74

Elektroenergetska saglasnost (prethodnu i stalnu) za objekte nazivne snage iznad 10 MVA i nazivnog napona iznad 20 kV izdaje DERK.

Elektroenergetska saglasnost za objekte nazivne snage ispod 10 MVA i nazivnog napona ispod 20 kV izdaje nadležno elektrodistributivno preduzeće.

Član 75

Za svako pojedinačno priključenje na elektroenergetsku mrežu krajnji kupac mora dobiti elektroenergetska saglasnost za priključenje, ako su ispunjeni elektroenergetski i tehnički uslovi propisani općim uslovima za

isporuku i snabdijevanje električnom energijom Brčko distrikta BiH.

O zahtjevu za dobijanje elektroenergetske saglasnosti za priključenje na distributivnu mrežu odlučuje putem javnog ovlaštenja korisnik dozvole za distribuciju u skladu sa odredbama Zakona o upravnom postupku u roku od 30 dana od dana podnošenja zahtjeva.

Na rješenje iz stave 2 ovog člana podnosilac zahtjeva može izjaviti žalbu Apelacionoj komisiji Brčko distrikta BiH, u skladu za Zakonom o upravnom postupku Brčko distrikta Bosne i Hercegovine.

Član 76

Za priključenje elektroenergetskih objekata krajnjih kupaca ili povećanje potrošnje električne energije, odnosno angažovane snage kod postojećih potrošača, u skladu sa Zakonom o općim uslovima za isporuku i snabdijevanje električnom energijom Brčko distrikta BiH, pribavlja se elektroenergetska saglasnost koja sadrži elektroenergetske i tehničke uslove za priključenje.

Ako se gradi novi ili rekonstruiše postojeći objekat koji treba snabdjeti električnom energijom ili koji povećava potrošnju električne energije, odnosno angažovane snage, saglasnost iz stava 1 ovog člana mora se pribaviti prije davanja odobrenja za izgradnju.

U slučaju iz stava 2 ovog člana investitor je dužan da pribavi i tehničke uslove za izradu tehničke dokumentacije za gradnju objekta, a i za rekonstrukciju postojećeg objekta, ako se povećava potrošnja električne energije, odnosno angažovana snaga.

Tehničke uslove iz stava 3 ovog člana daje korisnik dozvole na čije elektroenergetske objekte su priključeni objekti, uređaji i instalacije podnosioca zahtjeva.

XI. SNABDIJEVANJE ELEKTRIČNOM ENERGIJOM

Član 77

Snabdijevanje električnom energijom vrši se u skladu sa Zakonom o prenosu, regulatoru i operateru sistema električne energije u Bosni i Hercegovini, ovim zakonom, Općim uslovima za isporuku i snabdijevanje električnom energijom Brčko distrikta BiH, Tarifnim sistemom za prodaju električne energije i ugovorom koji mogu zaključiti snabdjevač i krajnji kupac.

Snabdijevanje električnom energijom podrazumijeva isporuku i/ili prodaju električne energije.

Član 78

Općim uslovima za isporuku i snabdijevanje električnom energijom Brčko distrikta BiH uređuju se:

- uslovi i način priključenja objekata krajnjih kupaca ili proizvođača električne energije na distributivnu mrežu, uključujući i izdavanje elektroenergetske saglasnosti,
- uslovi i način pristupa i korištenja distributivne mreže,
- uslovi i način priključenja gradilišta i privremenih objekata,
- kvalitet snabdijevanja električnom energijom,
- način na koji se utrošena električna energija mjeri, očitava, obračunava i naplaćuje,
- obaveze krajnjeg kupca/proizvođača u pogledu zaštite mjernih uređaja koji su na njegovom posjedu od neovlaštenog pristupa,
- zahtjevi u pogledu tačnosti mjernih uređaja,
- uslovi i način pod kojima može biti obustavljena i ograničena isporuka električne energije krajnjem kupcu,
- način informisanja krajnjih kupaca u slučaju obustave i ograničenja u isporuci električne energije,
- uslovi i način na koji se obračunavaju i isplaćuju štete uzrokovane neosnovanom obustavom isporuke električne energije, isporukom električne energije smanjenog kvaliteta ili ograničenjem isporuke električne energije,
- uslovi, način, mjere i redoslijed ograničenja isporuke električne energije u slučaju opće nestašice električne energije,
- uslovi pod kojima se isporuka električne energije ne obustavlja kupcima,

- mjere koje se preduzimaju u slučaju kvarova u elektroenergetskom sistemu i mjere zaštite elektroenergetskog sistema od prekomjerne potrošnje,
- način utvrđivanja snage i količine neovlašteno utrošene električne energije, kao i način obračuna i naplate tih količina električne energije i
- ostali odnosi između distributera, snabdjevača, krajnjih kupaca i proizvođača čiji su objekti priključeni na distributivnu mrežu.

Član 79

Tarifnim sistemom utvrđuju se kategorije krajnjih kupaca, tarifni elementi za izračunavanje (formiranje) cijene električne energije koja se isporučuje i način njihove primjene.

Član 80

Ugovor o snabdijevanju električnom energijom zaključuju snabdjevač i krajnji kupac u skladu za Zakonom o obligacionim odnosima, Općim uslovima za isporuku i snabdijevanje električnom energijom Brčko distrikta BiH i Tarifnim sistemom.

Član 81

Zakon o izmjenama i dopunama Zakona o električnoj energiji („Službeni glasnik Brčko distrikta BiH" broj 4/13), član 81 se briše.

XII. OBUSTAVA I OGRANIČENJE ISPORUKE ELEKTRIČNE ENERGIJE

Član 82

Korisnik dozvole za distribuciju može obustaviti isporuku električne energije u slučaju:

- redovnog i vanrednog održavanja,
- pregleda i remonta postrojenja,
- ispitivanja i kontrole mjerenja,
- proširenja mreže,
- drugih okolnosti utvrđenih Općim uslovima za isporuku i snabdijevanje električnom energijom Brčko distrikta BiH.

Predviđenu obustavu korisnik dozvole za distribuciju mora izvršiti u što kraćem roku.

Obustavu isporuke električne energije iz stava 1 ovog člana korisnik dozvole za distribuciju obavezno najavljuje 24 sata prije preuzimanja radnji iz stava 1 ovog člana.

Član 83

Korisnik dozvole za distribuciju, uz prethodno upozorenje, obustavlja isporuku električne energije krajnjem kupcu ako u roku određenom u upozorenju ne ispuni svoje obaveze u slijedećim slučajevima:

- ako krajnji kupac ometa isporuku električne energije drugom kupcu ili ne dozvoljava priključak novog kupca na distributivnu mrežu preko svog priključka;
- ako krajnji kupac zabrani ili onemoguću licima koja imaju ovlaštenje korisnika dozvole za prijenos ili distribuciju, za pristup do svojih dijelova priključaka, zaštitnih i mjernih instrumenata, energetskih objekata i uređaja i kada ti uređaji stvaraju smetnje,
- ako krajnji korisnik ne poštuje posebne uslove o ograničenju isporuke električne energije, u skladu sa ovim zakonom.

Član 84

Korisnik dozvole za distribuciju obustavlja isporuku električne energije krajnjem kupcu, uz prethodno obavještenje, ako on u roku određenom u obavještenju ne ispuni svoje obaveze, u slijedećim slučajevima:

- ako krajnji kupac, na opomenu korisnika dozvole za distribuciju, ne snizi snagu, odnosno količinu električne energije na ugovorenu vrijednost u zahtijevanom roku,
- ako krajnji kupac onemoguću pravilno registrovanje obračunskih količina ili troši električnu energiju bez zahtijevanih mjernih uređaja ili mimo njih,
- ako krajnji kupac ne plaća isporučenu električnu energiju u roku određenom ugovorom o isporuci, odnosno općim uslovima za isporuku i snabdijevanje električnom energijom Brčko distrikta BiH.

Član 85

Korisnik dozvole za distribuciju obustavlja isporuku električne energije krajnjem kupcu bez prethodnog upozorenja ili obavještenja:

- ako krajnji kupac radom svojih energetskih objekata i uređaja ugrožava život i zdravlje ljudi ili ugrožava okolinu,
- ako krajnji kupac, u roku koji odredi korisnik dozvole za distribuciju ili odgovarajući inspekcijски organ, ne odstrani ili do zahtijevane granice ne smanji smetnje koje prouzrokuju njegovi objekti i uređaji,
- ako krajnji kupac, bez saglasnosti korisnika dozvole za distribuciju, priključiti na mrežu svoje objekte, uređaje i instalacije ili drugima omogućiti priključenje objekata, uređaja i instalacija preko svojih objekata, uređaja i instalacija, najkasnije 48 sati od prijema obavještenja.

Član 86

Korisnik dozvole za distribuciju dužan je krajnjem kupcu, kojem je obustavljena isporuka električne energije na njegov račun ponovo priključiti na mrežu, kada krajnji kupac otkloni razloge koji su doveli do obustave isporuke električne energije.

Korisnik dozvole za distribuciju električne energije, koji je krajnjem kupcu neosnovano obustavio isporuku električne energije, mora na svoj račun ponovo priključiti njegove objekte, uređaje i instalacije na svoju mrežu, u roku od 24 sata računajući od trenutka kada se ustanovi neosnovana obustava isporuke električne energije.

Član 87

Krajnji kupac, kojem je zbog učinjene štete korisniku dozvole isključena električna energija, dužan je korisniku dozvole nadoknaditi štetu.

Krajnji kupac kojem je korisnik dozvole za distribuciju neosnovano obustavio isporuku električne energije, ima pravo na naknadu štete koja mu je time prouzrokovana.

Ukoliko krajnji kupac i korisnik dozvole distribuciju, sporazumno ne utvrde nastalu štetu u skladu s Općim uslovima za isporuku i snabdijevanje električnom energijom Brčko distrikta BiH iz stavova 1 i 2 ovog člana, štetu utvrđuje DERK.

Član 88

Ako dođe do nepredviđenog i nenadanog manjka električne energije na tržištu, pri čemu je ugrožena sigurnost ljudi i cjelovitost mreže, Vlada Brčko distrikta BiH, uz prethodnu konsultaciju sa DERK-om, donosi odluke o ograničenju isporuke električne energije određenim kategorijama krajnjih kupaca, određuje red ograničenja, način upotrebe električne energije i obaveznu proizvodnju električne energije.

DERK i korisnici dozvola moraju učiniti sve što je u njihovoj moći da se manjak električne energije što prije otkloni.

XIII. IZGRADNJA I ODRŽAVANJE ELEKTROENERGETSKIH OBJEKATA**Član 89**

Radi izgradnje i održavanja elektroenergetskih objekata izgrađenih na nekretnini koja nema direktan pristup sa javnog puta, korisnik dozvole ima pravo prolaza preko zemljišta na kome druga lica imaju pravo svojine, odnosno korišćenja.

Svoje pravo iz stava 1 ovog člana korisnik dozvole ostvaruje na osnovu saglasnosti koju, po njegovom zahtjevu, daje nadležni organ Vlade Brčko distrikta BiH.

Izuzetno, korisnik dozvole, u cilju obezbjeđenja uslova za redovno i nesmetano snabdijevanje krajnjih kupaca električnom energijom može da se, u hitnim slučajevima, koristi pravom prolaza do elektroenergetskih objekata i bez saglasnosti nadležnog organa.

Korisnik dozvole dužan je vlasnicima, odnosno korisnicima zemljišta iz stavova 2 i 3 ovog člana da nadoknadi štetu koju pričinu prolazom preko tog zemljišta.

Član 90

Vlasnici, odnosno korisnici nekretnina koje se nalaze ispod, iznad ili pored elektroenergetskih objekata i objekata u funkciji proizvodnje električne energije, ne smiju izvoditi radove

koji ometaju namjensko korišćenje tih objekata, odnosno obavljanje elektroenergetske djelatnosti ili ugrožavaju sigurnost ljudi i imovine, bez saglasnosti korisnika dozvole.

Izgradnjom objekata ili izvođenjem radova u blizini elektroenergetskih objekata i postrojenja ne smije se ometati normalno korišćenje tih objekata i postrojenja.

Zabranjeno je nanošenje štete elektroenergetskim objektima i ometanje njihovog rada.

Član 91

Zabranjeno je zasađivanje rastinja na zemljištu iznad, ispod ili u neposrednoj udaljenosti od elektroenergetskih vodova i postrojenja kojima se može ugrožiti sigurnost tih vodova, odnosno postrojenja, ljudskih života i imovine.

Korisnik dozvole ima pravo da, radi redovnog korišćenja i održavanja, odnosno zamjene izgrađenog elektroenergetskog objekta, održava trasu kresanjem ili otklanjanjem rastinja iznad, ispod ili pored tih elektroenergetskih objekata bez naknade vlasnicima zemljišta.

Zabranjeno je ometanje preduzimanja mjera iz stava 2 ovog člana.

Član 92

Ako se u cilju održavanja elektroenergetskih objekata na zemljištu na kome je bila odobrena i izvršena čista sječa, mora izvršiti kresanje ili sječa naknadno izraslih stabala, koja ugrožavaju elektroenergetske objekte ili ometaju njihovo normalno korišćenje, nije potrebno pribavljanje nove dozvole za sječu niti ponovno plaćanje naknade vlasnicima.

Član 93

Prije izdavanja uslova za uređenje prostora za izgradnju ili rekonstrukciju objekata koji se nalaze u blizini elektroenergetskih objekata ili objekata u funkciji proizvodnje električne energije, organ uprave nadležan za izdavanje uslova za uređenje prostora dužan je da pribavi saglasnost korisnika dozvole.

Član 94

Eksproprijacija nepokretnosti u cilju izgradnje elektroenergetskih objekata vrši se u skladu sa odredbama Zakona o eksproprijaciji koji se primjenjuje na području Brčko distrikta BiH.

XIV. NADZOR**Član 95**

Kontrolu izgradnje objekata, tehničke ispravnosti, pogonske sigurnosti elektroenergetskih objekata i postrojenja, sigurnosti ljudi u elektroenergetskim objektima, kao i uvid u tehničku i pogonsku dokumentaciju vrši nadležna elektroenergetska inspekcija u skladu s posebnim zakonom.

Član 96

Inspekcijски nadzor obuhvata nadzor nad primjenom ovog zakona, drugih propisa i općih akata, standarda, tehničkih normativa i normi kvaliteta koji se odnose na projektovanje, građenje, odnosno rekonstrukciju, održavanje i korišćenje elektroenergetskih objekata, instalacija, uređaja, postrojenja i opreme u tim objektima, kao i kvalitet isporuke električne energije.

XV. KAZNENE ODREDBE**Član 97**

U slučaju kada korisnik dozvole svojim postupkom, radeći nezakonito, ostvari ekonomsku dobit koja premašuje visinu kazne, preduzet će se potrebne mjere zaštite općeg interesa i primijeniti kazne srazmjerno nanesejoj šteti, u skladu sa ovim i drugim zakonima.

Član 98

Novčanom kaznom od 5.000 do 17.000 KM kaznit će se za prekršaj preduzeće ili drugo pravno lice, ako:

1. započne rad i izgradnju bez dozvole,
2. njegov elektroenergetski objekat ne ispunjava propisane tehničke uslove (član 4 ovog zakona),

3. priključi svoja trošila na mrežu ili poveća priključnu snagu trošila električne energije bez elektroenergetske saglasnosti (član 76 ovog zakona),
4. samovoljno priključi svoje elektroenergetske objekte na elektroenergetsku mrežu (član 66 ovog zakona),
5. DERK-u ne dostavi tražene podatke i informacije.

Za radnje iz stava 1 ovog člana kaznit će se i odgovorno lice u preduzeću ili drugom pravnom licu novčanom kaznom od 1.000 do 1.700 KM.

Član 99

Novčanom kaznom od 5.000 do 17.000 KM kaznit će se za prekršaj korisnik dozvole ako:

1. elektroenergetski objekti i postrojenja elektroprivrednog preduzeća ne ispunjavaju propisane tehničke elektroenergetske i druge propisane uslove (član 4 ovog zakona),
2. u vrijeme nenadanog i nepredviđenog manjka električne energije na tržištu ne primijeni mjere predviđene odlukama Vlade Brčko distrikta BiH (član 88 ovog zakona),
3. sredstvima javnog informisanja ne obavijeste blagovremeno krajnje kupce o obustavi isporuke električne energije (član 84 ovog zakona),
4. ne ispunjava ili neblagovremeno ispunjava obaveze iz dozvole i nakon pismenog upozorenja DERK-a (član 64 ovog zakona);

Za radnje iz stava 1 ovog člana kaznit će se i odgovorno lice korisnika dozvole novčanom kaznom od 1.000 do 1.700 KM.

Član 100

Novčanom kaznom od 3.000 do 10.000 KM kaznit će se za prekršaj:

1. preduzeće ili drugo pravno lice – investitor ako nastavi gradnju objekta, odnosno izvođenje drugih radova po donošenju rješenja o obustavi radova prije otklanjanja svih nepravilnosti i nedostataka zbog kojih su gradnja, odnosno izvođenje radova obustavljeni,
2. preduzeće ili drugo pravno lice koje nastavi da koristi elektroenergetski objekat, instalacije, uređaje, postrojenja i opremu po prijemu rješenja o zabrani njihovog korišćenja, prije nego što otkloni nepravilnosti i nedostatke konstatovane rješenjem.

Za prekršaj iz stava 1 ovog člana kaznit će se i odgovorno lice u pravnom licu novčanom kaznom od 1.000 do 1.700 KM.

Član 101

Novčanom kaznom od 3.000 KM kaznit će se za prekršaj preduzeće ili drugo pravno lice ako po otklanjanju nedostataka i nepravilnosti utvrđenim rješenjem o tome ne obavijesti elektroenergetskog inspektora.

Za radnju iz stava 1 ovog člana kaznit će se i odgovorno lice u preduzeću i drugom pravnom licu kaznom od 1.000 KM.

Član 102

Novčanom kaznom od 1.000 do 3.000 KM kaznit će se za prekršaj korisnik dozvole za distribuciju:

1. ako ne izda tehničke uslove u skladu s članom 76 ovog zakona,
2. ako ne izda rješenje o elektroenergetskoj saglasnosti ili ne priključi na svoju mrežu elektroenergetski objekat krajnjeg kupca, ako su ispunjeni uslovi iz člana 76 ovog zakona.

Za radnju iz stava 1 ovog člana kaznit će se i odgovorno lice u preduzeću novčanom kaznom od 500 do 1.000 KM.

Član 103

Novčanom kaznom od 1.000 do 3.000 KM kaznit će se za prekršaj odgovorno lice u pravnom licu ili fizičko lice ako:

1. ometa preduzimanje mjera iz člana 91, stav 2 ovog zakona,
2. zasadi rastinje na zemljištu, iznad, ispod ili na nepropisnoj udaljenosti od elektroenergetskih vodova i postrojenja (član 91, stav 1 ovog zakona),

3. bez prethodne saglasnosti izvodi radove ispod, iznad ili pored elektroenergetskih objekata i postrojenja (član 90 ovog zakona),
4. onemogućiti pravilno registrovanje utrošene električne energije u skladu sa Zakonom o općim uslovima za isporuku i snabdijevanje električnom energijom Brčko distrikta BiH,
5. njegovi elektroenergetski objekti ne ispunjavaju propisane tehničke uslove iz Zakona o općim uslovima za isporuku i snabdijevanje električnom energijom Brčko distrikta BiH,
6. ako krajnji kupac ometa isporuku električne energije drugom kupcu ili ne dozvoljava priključak novog kupca na distributivnu mrežu preko svog priključka (član 83 alineja 1 ovog zakona);
7. ne svede vršno opterećenje u ugovorenu mjeru, u skladu sa Zakonom o općim uslovima za isporuku i snabdijevanje električnom energijom Brčko distrikta BiH,
8. nanosi štetu elektroenergetskim objektima i ometa njihov rad (član 90, stav 3 ovog zakona),
9. onemogućiti ovlaštenom licu pristup do mjernih uređaja, instalacija i priključaka (član 83 stav 1 tačka 2).

Član 104

Novčanom kaznom od 1.000 do 3.000 KM kaznit će se za prekršaj fizičko lice ako koristi električnu energiju bez elektroenergetske saglasnosti, ili ako je samovoljno priključilo svoje elektroenergetske objekte na elektroenergetsku mrežu (član 66 ovog zakona).

XVI. PRIJELAZNE I ZAVRŠNE ODREDBE

Član 105

Zakon o izmjenama i dopunama Zakona o električnoj energiji („Službeni glasnik Brčko distrikta BiH“ broj 4/13), član 105 se briše.

Član 106

Ovaj zakon stupa na snagu osmog dana od dana objavljivanja u "Službenom glasniku Brčko distrikta BiH", a primjenjivat će se od dana formiranja Državne elektroenergetske regulatorne komisije Bosne i Hercegovine (DERK), Nezavisnog operatera sistema (NOS) i DERK-a za energiju Brčko distrikta BiH (DERK).

Član 107

Zakon o izmjenama i dopunama Zakona o električnoj energiji („Službeni glasnik Brčko distrikta BiH“ broj 4/13), član 107 se briše.

Član 107a

(1) S ciljem regulisanja elektroenergetskog sistema u Brčko distriktu u očekivanju potpunog usklađenja zakonodavstva u Bosni i Hercegovini s pravnom stečevinom EU, Državna regulatorna komisija za električnu energiju Bosne i Hercegovine (DERK) u skladu sa zakonima Bosne i Hercegovine izvršava regulatorna ovlaštenja u Brčko distriktu u odnosu na sva pitanja vezana za električnu energiju, uključujući:

- a) nadzor i regulisanje odnosa između proizvodnje, distribucije i snabdijevanja s jedne, i kupaca električne energije uključujući trgovce električnom energijom, s druge strane;
- b) propisivanje metodologije i kriterija za utvrđivanje cijena snabdijevanja nekvalificiranih kupaca električne energije;
- c) utvrđivanje tarifnih stavova za korisnike distributivnih sistema i tarifnih stavova za nekvalificirane kupce;
- d) izdavanje i oduzimanje dozvola za proizvodnju, distribuciju, snabdijevanje i trgovinu električnom energijom;
- e) izdavanje prethodnih dozvola za izgradnju i dozvola za korištenje elektroenergetskih objekata namijenjenih proizvodnji, distribuciji odnosno snabdijevanju električnom energijom;
- f) utvrđivanje općih uslova za isporuku električne energije.

(2) Tarife za usluge proizvodnje, distribucije i snabdijevanja, saglasno odredbama stava 1 ovog člana reguliše i odobrava Državna regulatorna komisija za električnu energiju.

(3) U slučaju sukoba ove odredbe s preostalim odredbama ovoga zakona ili u slučaju sukoba odredaba ovog

zakona sa zakonima Bosne i Hercegovine, primjenjuje se ova odredba odnosno odredbe zakona Bosne i Hercegovine.

Član 108 (Stupanje na snagu)

Ovaj zakon je stupio na snagu 23. oktobra 2004. godine, a njegove izmjene i dopune 26. juna 2007. godine, 29. decembra 2011. godine i 15. marta 2013. godine.

345

Na osnovu člana 8 Zakona o Službenom glasniku Brčko distrikta BiH („Službeni glasnik Brčko distrikta BiH“ brojevi 1/00 i 17/04) i Odluke o davanju ovlaštenja Zakonodavnoj komisiji Skupštine Brčko distrikta BiH broj 01-02-218/17 od 13. 09. 2017. godine, Zakonodavna komisija Skupštine Brčko distrikta BiH na 43. sjednici održanoj 20. 6. 2018. godine utvrdila je prečišćeni tekst Zakona o Trezoru Brčko distrikta BiH („Službeni glasnik Brčko distrikta BiH“ broj 03/07) sa izmjenama Zakona o Trezoru Brčko distrikta BiH („Službeni glasnik Brčko distrikta BiH“ broj 19/07 ,02/08 i 35/17).

Broj: 01.3.-05-684/18
Brčko, 20. 6. 2018. godine

PREDSJEDAVALA ZAKONODAVNE KOMISIJE Ljubiša Lukić, s. r.

ZAKON O TREZORU BRČKO DISTRIKTA BiH (PREČIŠĆEN TEKST)

I. OPĆE ODREDBE

Član 1 (Predmet)

Ovim zakonom se uspostavlja Trezor i propisuje njegovo osnivanje, organizacija, upravljanje i nadležnost.

Član 2 (Definicije)

U smislu ovog zakona izrazi koji se koriste imaju sljedeća značenja:

- Budžet** – predstavlja propis Skupštine Brčko distrikta kojim se reguliše plan finansijskih aktivnosti, iznosa prihoda i primitaka, te utvrđenih izdataka i drugih plaćanja za period od jedne fiskalne godine. Godišnjim budžetom se utvrđuje gornja granica ukupnog zaduživanja koje u sebi uključuje postojeći dug i nova zaduženja za tu budžetsku godinu;
- Budžetski korisnici** – su svi organi i institucije koje se finansiraju iz budžeta;
- Interna kontrola** – označava organizaciju, politike i procedure koji se koriste da bi programi Skupštine i Vlade Brčko distrikta postigli planirane i namjeravane rezultate;
- Novo zaduživanje** - obuhvata cjelokupne procedure, uključujući pregovaranja oko uslova, pripremu dokumenata, neophodnih odobrenja i njihovo izvršenje, neophodno za stvaranje novih obaveza između korisnika i davaoca kredita, u skladu sa zakonom i drugim propisima;
- Prognoza o zaduživanju** - je procjena iznosa ukupnog zaduživanja za sljedeću fiskalnu godinu, kao i za naredne godine, a koja se zasniva na iznosima trenutno neizmirenih dugova, otplatnim planovima postojećih zaduženja i ukupnom projiciranju novih zaduživanja, koja će se desiti u narednim periodima;
- Javni prihodi** - su porezni i neporezni prihodi, prihodi iz sopstvenih izvora, grantovi i ostali prihodi koji se obavezno prikupljaju i polažu na jedinstveni račun Trezora i isplaćuju s jedinstvenog računu Trezora;
- Modificirano načelo obračunavanja prihoda i rashoda** – znači da se prihodi i primici priznaju u računovodstvenom obračunskom periodu u kojem su mjerljivi i raspoloživi, a rashodi nastaju u momentu u

kojem je obaveza za plaćanje nastala, bez obzira da li je izvršeno i samo plaćanje;

- Transakcijski računi** - su bankovni računi otvoreni u poslovnim bankama od strane Trezora Brčko distrikta BiH i preko kojih se vrše svakodnevne transakcije vezane za troškove budžetskih korisnika;
- Depozitni računi** - su računi otvoreni u poslovnim bankama na koje se polažu i prikupljaju javni prihodi;
- Račun za zaštitu i investiranje** – je račun otvoren u Centralnoj banci Bosne i Hercegovine ili u poslovnoj banci i čija je svrha prihvatanje i zaštita prikupljenih javnih prihoda;
- Računi posebne namjene** – su računi koje otvara Trezor Brčko distrikta na zahtjev budžetskih korisnika u svrhu izdvajanja sredstava za finansiranje specifičnih namjena (sredstva od izvršenog otkupa stanova ili od privatizacije preduzeća i imovine u svojini Brčko distrikta i sl.).

Član 3 (Status)

Trezor se uspostavlja kao organizaciona jedinica Direkcije za finansije Brčko distrikta BiH (u daljnjem tekstu: Direkcija za finansije), i nosi naziv: "Trezor".

Član 4 (Pečat Trezora)

(1) Trezor ima svoj pečat, okruglog oblika, ispisan tekстом: "Bosna i Hercegovina, Brčko distrikt BiH, Direkcija za finansije Brčko distrikta BiH, Trezor".

(2) Bliže odredbe o broju, veličini, obliku, sadržaju i upotrebi pečata utvrdit će se aktom Trezora u skladu sa Zakonom o pečatu Brčko distrikta BiH ("Službeni glasnik Brčko distrikta BiH" br. 12/01).

Član 5 (Nadležnosti)

Nadležnosti Trezora su:

- Otvaranje i vođenje svih računa koji ulaze u sistem jedinstvenog računa Trezora;
- Raspoređivanje naplaćenih javnih prihoda u skladu s utvrđenim propisima i pravilima;
- Prijenos javnih prihoda s depozitnih računa na račune za zaštitu i investiranje i transakcijske račune;
- Objedinjavanje sredstava u sistem jedinstvenog računa Trezora uključujući sredstva primljena s depozitnih računa, sredstva od grantova i kredita, kao i sredstva od ostalih finansijskih transakcija;
- Izvršenje obaveza, isplata ili prijenos sredstava na osnovu odobrenog budžeta i finansijskih planova;
- Transfer privremenih viškova gotovine između računa Trezora s ciljem izmirivanja kratkoročnih zahtjeva za gotovinom potrebnih za izvršenje budžeta;
- Planiranje i kontrola izvršenja budžeta;
- Održavanje sistema računovodstva i izvještavanja, te računovodstvene evidencije u skladu s međunarodno priznatim standardima za računovodstvo u javnom sektoru;
- Centralizovani obračun i isplate plaća za budžetske korisnike;
- Održavanje kontrole u upravljanju i računovodstvu kojom se uspostavlja odgovornost za transakcije javnih prihoda, primitaka, finansija i izdataka, uključujući ugovorene obaveze za buduća plaćanja;
- Uspostavljanje informatičkih i funkcionalnih postupaka za upravljanje finansijskim informacijama, te razvijanje i održavanje finansijskog informacionog sistema;
- Odgovornost za ukupan dug uključujući novo zaduživanje, planiranje i upravljanje dugom.

II. NAČIN RADA TREZORA

Član 6 (Rukovođenje Trezorom)

- Trezorom rukovodi direktor Trezora kojeg imenuje gradonačelnik Brčko distrikta BiH (u daljnjem tekstu: gradonačelnik);
- U rukovođenju Trezorom direktor Trezora:
 - organizuje rad Trezora u skladu sa zakonom;